

Konsep Usahawan Al – Falah Menurut Pandangan Ahli Sarjana: Kajian Literatur

Musa bin Muhamad Ali
Akademi Tamadun Islam
Fakulti Sains Sosial dan Kemanusian
Universiti Teknologi Malaysia
musa.ali@mara.gov.my

Mohd Fauzi Bin Abu @Hussin
Akademi Tamadun Islam
Fakulti Sains Sosial dan Kemanusian
Universiti Teknologi Malaysia
mohdfauziabu@utm.my

Siti Salwa Md Sawari
Kulliyyah Bahasa dan Pengurusan
Universiti Islam Antrabangsa Malaysia
salwa_sawari@iium.edu.my

Abstrak

Tujuan artikel ini adalah menjelaskan konsep usahawan al- Falah dalam kalangan sarjana. Kajian ini berbentuk kajian literatur yang mana pengkaji menggunakan sumber-sumber sekunder daripada artikel, tesis dan juga wacana-wacana ilmiah bagi menjelaskan konsep-konsep yang mendokongi usahawan Muslim Berjaya. Daripada hasil kajian literatur, pengkaji mendapati secara asasnya, usahawan Muslim berjaya dari perspektif muamalah Islam merupakan individu cemerlang bukan sahaja dalam aktiviti keusahawanan tetapi pada masa yang sama taat pada perintah agama. Dalam perspektif Islam, keseimbangan seseorang usahawan memperolehi kejayaan dunia dan pada masa yang sama memenuhi tuntutan agama dan syariat dikenali sebagai usahawan ‘al - Falah’. Dengan erti kata lain, konsep al - Falah adalah suatu pencapaian cemerlang mencakupi keseluruhan aspek kehidupan manusia meliputi kerohanian, kebendaan, moral dan sebagainya untuk mencapai kejayaan di dunia dan akhirat.

Kata Kunci: Perniagaan, Muamalah, Usahawan Muslim, Al- Falah, Ibadah

Pendahuluan

Muktahir ini, berlaku peningkatan bilangan usahawan bumiputera Muslim terutama usahawan melayu menubuhkan perusahaan sendiri serta terlibat dalam pelbagai bidang perniagaan, namun pencapaian yang diperolehi masih jauh dari sasaran. Penglibatan bumiputera turut dilihat masih kurang dalam pelbagai aspek walaupun pelbagai program pembangunan ekonomi telah dilaksanakan (Belanjawan, 2020). Ini terbukti sehingga hari ini sasaran mencapai pemilikan ekuiti bumiputera 30 peratus masih gagal diperolehi (Muhammed Abdul Khalid, 2014; Madeline Berma, 2015; Muhamad Najit Sukemi et. al, 2018; Dewan Rakyat, 2019). Sejak tahun 2008 syarikat bumiputera hanya mencatat 16 peratus sahaja daripada jumlah tawaran awam permulaan (*initial public offering atau IPO*) sedangkan jumlah penduduk Malaysia adalah 66 peratus (Malaysia, 2010). Kebanyakan perniagaan baharu bumiputera terlibat dalam subsektor atau aktiviti yang

rendah nilai projeknya (Malaysia, 2010) dan tentunya dilihat bertentangan dengan matlamat ke arah berpendapatan tinggi. Majoriti syarikat bumiputera berskala kecil dengan 65 peratus daripadanya menjana pendapatan kurang daripada RM250,000 setahun. Sebagai contoh, 42 peratus perniagaan milik Bumiputera mempunyai kurang daripada lima pekerja, sementara 21 peratus memiliki 5 hingga 50 orang pekerja (Laporan TERAJU, 2013).

Justeru, kajian memperkasakan usahawan bumiputera Muslim perlu dipergiatkan oleh cendiakawan Islam. Walaubagaimanapun, kajian keusahawanan Islam dan kaitannya dengan kejayaan (al – Falah) tidak banyak dilakukan oleh para cendiakawan Islam (Shuhairimi dan rakan – rakan, 2015). Melalui penulisan oleh Angela dan rakan – rakan (2014) dalam ‘review dan research agenda’ yang mengumpulkan kajian kesan keagamaan dan kerohanian terhadap aktiviti keusahawanan menunjukkan sebahagian besar kajian di pelopori oleh cendiakawan bukan Islam (Rujuk Angela et. al, 2014). Tentunya dapatan ilmu yang berhasil dari perspektif barat ini merupakan satu ancaman terutama yang melibat pegangan agama memandangkan akidah tidak boleh dikompromi. Dari aspek lain pula ia menggambarkan kekalahan moral Islam itu sendiri (Solahuddin et. al, 2015).

Bagi tokoh ekonomi Islam kontemporari iaitu Siddiqi (1979) dalam ‘Economic Enterprise In Islam’ mendefinisikan usahawan sebagai:

“Seseorang yang mempunyai kemahiran dan keupayaan dalam menggabungkan pelbagai faktor pengeluaran yang diperlukan bagi menghasilkan keperluan. Usahawan juga menanggung risiko terhadap kegagalan dalam memenuhi sesuatu yang diharapkan disebabkan oleh kehendak pasaran. Mereka berusaha mencari pendapatan bagi kehidupan yang baik melalui perusahaan perniagaan dan dengan usaha ini ia juga mereka menyumbang kepada masyarakat”.

Berbeza pula dengan al – Qardhawi (2011) mentafsirkan usahawan sebagai:

“Pekerja dan pengusaha, seseorang yang berusaha untuk memenuhi keperluan diri dan keluarganya di samping turut berperanan untuk merealisasikan kesejahteraan masyarakat dan dengan usaha ini ia dapat menafkahkan hartanya ke jalan Allah serta meninggikan agama-Nya”.

Bagi Suhaila (2005), beliau mengaitkan usahawan dengan aspek ibadat dan nilai Islam dengan mentakrifkannya sebagai individu yang memperolehi ganjaran berlipat kali ganda oleh Allah SWT kerana memenuhi keperluan masyarakat dan mengamalkan nilai – nilai serta etika yang digariskan oleh Islam (Suhaila et al., 2005). Usahawan Muslim juga menurut Sudin (1990) adalah seseorang yang berterusan mencari, menggembungkan tenaga serta memanfaatkan kurniaan Allah untuk kepentingan diri sendiri dan kehendak masyarakat selari dengan tuntutan al-Quran dan as-Sunnah (Sudin, 1990).

Bagi Adnan et al. (1992) pula mentakrifkan usahawan sebagai individu yang sentiasa mencari dan menilai peluang perniagaan dengan tujuan meraih keuntungan dan mengembangkan perniagaan melabur sebahagian daripada hartanya. Pada masa yang sama usahawan menyedari tanggungjawabnya sebagai hamba Allah sentiasa menjaga hubungan dengan Allah dengan meletakkan setiap perbuatan kerana Allah. Maka dengan itu, artikel ini akan memperincikan motivasi Muslim untuk menceburi bidang perniagaan. Kajian ini turut menjelaskan konsep usahawan Al - Falah dalam kalangan Muslim di Malaysia.

Konsep Keusahawanan Islam Al – Falah

Dalam perspektif Islam, keseimbangan seseorang usahawan memperolehi kejayaan dunia dan pada masa yang sama memenuhi tuntutan agama dan syariat dikenali sebagai usahawan ‘al - Falah’. Justeru, konsep al - Falah adalah suatu pencapaian cemerlang mencakupi keseluruhan aspek kehidupan manusia meliputi kerohanian, kebendaan, moral dan ini selaras dengan firman Allah s.w.t. yang bermaksud:

“Sungguh beruntung orang – orang yang beriman, iaitu orang yang khusyu’ dalam solatnya, dan orang yang menjauhkan diri dari perbuatan dan perkataan yang tidak berguna, dan orang yang menunaikan zakat, dan orang yang memelihara kemaluannya, kecuali terhadap isteri-isteri mereka atau hamba sahaya yang mereka miliki; maka sesungguhnya mereka tidak tercela”.

(Surah al-Mukminun: 1-6)

Berdasarkan Surah al-Mukminun ayat 1-6 sudah lengkap menjelaskan konsep usahawan al – Falah. Dalam menunaikan tanggungjawab sebagai seorang usahawan, selain memperolehi keuntungan fizikal kerana Islam tidak menghalang usahawan menikmati keuntungan, usahawan al – Falah pada masa yang sama juga perlu menjaga hubungannya dengan Allah melalui kepatuhan terhadap rukun Iman dan Islam, menjauhi perbuatan yang tidak berguna seperti melakukan perbuatan syirik, rasuah, maksiat serta pelbagai tindakan negatif yang lain. Pada masa yang sama hubungan sesama insan turut dijaga melalui pemberian bantuan kepada masyarakat khususnya di kalangan orang Islam yang berada dalam kesusaahan, bersedekah, berwakaf dan menunaikan zakat. Operasi keusahawanan pula sentiasa dilaksanakan dalam landasan syariat agama. Jika elemen – elemen ini diamalkan oleh usahawan Muslim maka konsep usahawan al – Falah telah berjaya dihayati.

Jika diselusuri perkembangan ilmu keusahawanan yang dikaitkan dengan Islam dilihat masih baharu. Rata – rata Ilmuan Islam yang membincangkan ilmu keusahawanan Islam merujuk kepada teori dan konsep keusahawanan Barat yang telah berkembang sejak kurun ke-18. Sehingga kini pengkaji masih belum memenuhi suatu istilah khusus yang merujuk kepada perkataan usahawan atau keusahawanan di dalam bahasa Arab sama ada dalam konteks perbahasan tokoh ilmuan Islam terdahulu mahupun sekarang (Mohd Zain, 2016). Menurut Mohd Zain lagi, jika dirujuk di dalam al-Quran tidak ditemui perkataan yang secara khusus merujuk kepada usahawan atau keusahawanan. Hanya perkataan *al-Tijarah*, iaitu perniagaan atau bermaksud urusan jual beli yang dibincangkan dalam Fiqh Mu’amalah. Kelazimannya perbahasan dalam bab ini menggunakan perkataan peniaga dan perniagaan yang boleh dimaksudkan dengan usahawan dan keusahawanan. Namun begitu, Ibnu Khaldun telah membincangkan aspek keusahawanan dalam konteks perdagangan.

Menurut Shuhairimi et. al (2018), beliau merumuskan bahawa perbincangan definisi keusahawanan antara perspektif Islam dan Barat adalah dibezakan oleh elemen ketuhanan atau kerohanian yang merujuk kepada tanggungjawab dalam memenuhi tuntutan sebagai hamba dan khalifah. Para sarjana Islam jelas meletakkan definisi usahawan bukan sahaja mementingkan sudut keuntungan material tetapi meletakkan sebagai suatu bentuk ibadah dalam mencapai kesejahteraan di dunia dan di akhirat.

Keusahawanan Islam dilihat bukan merupakan satu cabang dalam pengajian keusahawanan berorientasikan perspektif Barat atau di panggil konvensional. Terjadinya persempahan penulisan yang mengasingkan keusahawanan Islam daripada yang lain khususnya aliran pendapat dan perkembangan di Barat disebabkan oleh perbezaan pendekatan dan penekanan (Adnan Alias, 2001)(Ramadani et al., 2017). Asasnya, falsafah keusahawanan Islam adalah berpandu kepada Rabbani atau bercirikan ketuhanan (al – Qardhawi, 2001). Terdapat beberapa prinsip yang membezakan konsep keusahawanan Islam dengan konsep keusahawanan konvensional dan keadaan inilah adalah berasaskan kepada prinsip kesepaduan, fitrah insan, dorongan, ibadah, kedudukan perniagaan dan usahawan, sistem dan contoh perlakuan (Adnan et al., 1992).

Prinsip Keusahawanan Islam

Ibadah

Perniagaan halal merupakan ibadah yang menjadi sebahagian daripada tuntutan fardhu kifayah seperti yang disebut dalam al – Quran :

“Dan Allah menghalalkan jual beli dan mengharamkan riba”.

(al - Baqarah :

275).

Usahawan melalui perniagaan dilihat memenuhi tuntutan fardhu kifayah apabila memberi perkhidmatan kepada masyarakat Islam khususnya. Barang yang ditawarkan oleh usahawan Muslim, terutama bahan makanan tentunya menimbulkan rasa yakin tanpa was – was disebabkan kesuciannya yang mematuhi segala yang dikehendaki ajaran Islam (Aminuddin et al., 2017). Dalam memberikan perkhidmatan kepada masyarakat, usahawan turut menjaga kebijakan diri dan keluarga sendiri. Baginda Rasulullah SAW ketika ditanya jenis mata pencarian yang paling baik, baginda menjawab hasil dari usaha diri sendiri dan setiap perniagaan yang bersih (Ahmad Baihaqi).

Kedudukan perniagaan dan usahawan

Islam meletakkan kedudukan usahawan di tingkat tertinggi kerana sumbangan besarnya kepada masyarakat khususnya kepada umat Islam. Kehadiran usahawan Muslim yang berada di tengah – tengah kelompok usahawan bukan Islam telah menyelamatkan umat Islam daripada terjebak menggunakan barang yang tidak halal. Itu merupakan satu jihad yang besar dan oleh sebab itu dipandang mulia di sisi agama (Ali Hashim, 2003; Noorfazreen et. al, 2018). Adnan et. al (1992) dalam bab Model Perlakuan Usahawan Mukmin telah membuat satu model bagi menunjukkan keistimewaan kedudukan perniagaan dan usahawan dalam Islam. Di dalam model tersebut, perkara pertama dimulakan dengan Islam menganjurkan perniagaan maka usahawan perlu berusaha melakukannya manakala Allah menyediakan kemudahan seperti laut (sebagai jalan perhubungan), kapal (sebagai alat pengangkutan), angin (sebagai kuasa mengarah hala dan tujuan), keamanan (sebagai persekitaran yang menggalakkan perdagangan, musim dan perlindungan). Islam seterusnya menggariskan peraturan bagi memastikan perniagaan berjalan dengan betul dan menguntungkan semua pihak terlibat dan menjanjikan ganjaran bagi mereka yang mematuhi

peraturan yang ditetapkan oleh ajaran Islam. Apabila model ini dipatuhi prinsipnya pasti menjadikan kedudukan perniagaan dan usahawan berada di tahap mulia di sisi Allah SWT.

Malah, ketinggian darjat usahawan Muslim digambarkan oleh hadith Rasulullah SAW yang diriwayatkan oleh Ibn Majah dan Al – Hakim:

“Pedagang yang beramanah dan dapat dipercayai akan bersama orang – orang yang mati syahid nanti di hari qiamat”.

Fitrah Insan

Melalui fitrah kejadian manusia, insan itu mestilah terlebih dahulu memiliki sifat *Muslim* sebelum terlibat sebagai usahawan. Insan Muslim pasti akan mengabdikan diri kepada Allah yang bertanggungjawab menjalankan tugas *ibadah* dan *khalifah* yang sentiasa mengagungkan Allah dan mengutamakan hak dan hukum Allah dalam segala aspek kehidupan, mencari keredhaan dan rahmat Allah lebih dari segalanya. Usahawan yang berciri insan Muslim tidak meletakkan keuntungan dan kekayaan sebagai keutamaan semata – mata tetapi melaksanakan aktiviti keusahawanan sebagai memenuhi tuntutan *fardhu kifayah* (Solahuddin et al., 2017). Keuntungan adalah musabab yang terjadi dengan kehendak Allah. Amanah yang diberi bertujuan untuk memakmurkan bumi Allah ini asalkan setiap aktiviti keusahawanan yang dilakukan adalah halal berlandaskan ubudiah dan tauhid. Keusahawanan Islam lebih mengajurkan konsep *Islamic Man* berbanding konsep Barat yang menekankan *Economic Man* (Adnan et al., 1992).

Dorongan

Secara umumnya perjalanan usahawan adalah menuju kejayaan namun bagi perspektif Islam, perkara yang mendorong usahawan Muslim terlibat dalam keusahawanan telah ditetapkan kriterianya iaitu mencapai kejayaan yang seimbang dunia dan ukhrawi. Dalam Islam kejayaan disebut *falah*, *aflaha* dan juga perkataan daripada kata kerja *faza fawzan* (Hamka, 1992). Untuk mencapai *falah*, perlu memenuhi syarat sebagaimana yang disebut seperti saranan Al-Qurthubi, iaitu rezeki yang halal, qanaah (redha setakat yang diperolehi), taufik iaitu ketentuan dari Allah sesuai dengan apa yang diharap, sa’adah (bahagia) dan jannah (Adnan, 1997). *Mufligh* juga ditafsir sebagai kejayaan iaitu mencapai sesuatu yang diingini dalam bentuk kebahagian dunia dan akhirat, kemakmuran, bebas dari kebimbangan, kesusahan, atau fikiran terganggu (tafsir ayat 104: Ali ‘Imran).

Sistem

Keusahawanan Islam mewujudkan satu sistem ekonomi Islam. Sistem yang berteraskan ekonomi Islam menekankan prinsip keadilan dan kesejahteraan (Solahuddin et. al, 2018). Namun hakikatnya perniagaan dunia hari ini dikuasai oleh sistem ekonomi kapitalis. Bagi sistem ekonomi Islam menguasai dilihat suatu yang agak mustahil namun sistem kewangan dilihat berpotensi untuk ditembusi. Atas sebab itu, usahawan Muslim perlu menceburi bidang keusahawanan yang dilihat sebagai tuntutan agama bagi memberi ruang untuk sistem ekonomi Islam mendominasi ekonomi dunia kerana terbukti untuk menguasai dunia perlu ditakluki dahulu ekonominya (Joni, 2008). Adnan (2001) mengkategorikan sistem kewangan kepada empat kategori sistem perbankan

yang diamalkan oleh negara – negara Islam iaitu perbankan Islam sahaja, dua sistem selari, sistem *conventional plus* (sistem tempelen) dan *sistem conventional* sahaja. Dalam hal ini hanya Malaysia satu – satunya negara yang mengamalkan dua sistem selari.

Kesepadan

Konsep kesepadan dalam Islam meletakkan apa sahaja yang dikaji perlu meletakkan kerangka agama kerana agama adalah satu cara hidup. Memisahkan sesuatu pengkajian Ilmiah dengan kerangka Islam walaupun rasional dan logik akan menyebabkan berlaku penyimpangan dalam merangka dasar dan prinsip. Sesetengah masyarakat akan meletakkan persepsi Islam itu tidak sesuai lagi dengan tuntutan realiti semasa. Maka timbulah dakwaan Islam menentang kemajuan dan orang Islam tidak akan berkembang sifat keusahawannya. Malah ada yang mendakwa Islam tidak menggalakkan aktiviti keusahawanan (Mebroui & Mosbah, 2020). Sebenarnya Islam bukanlah penyebab ketidaksesuaian realiti semasa tetapi realiti amalan semasalah yang tidak sesuai dengan Islam. Justeru, yang perlu diubah bukanlah kerangka Islam tetapi realiti semasa itu yang perlu diubah (Adnan, 1993).

Sebagai contoh, ada yang mendakwa susah untuk berjaya dan kaya jika tiada rasuah memandangkan jalan belakang mudah mendapat tempat atau susah untuk untung jika tidak menipu. Malah sikap keji ini seolah menjadi budaya niaga menikmati keuntungan. Hakikatnya budaya niaga keji ini seolah memperlihatkan matlamat tidak menghalalkan cara. Malah budaya niaga Islam yang berasaskan nilai murni dan etika yang dianjurkan Islam berjaya membuktikan keuntungan berupaya dinikmati. Ini jelas berdasarkan contoh yang ditunjukkan oleh Rasulullah sendiri di mana baginda telah membuka sebuah pasar *Sawqul Madinah* (pasar Madinah) sebagai tempat berhimpunnya pedagang Muslim dengan budaya niaga Islam tinggi yang menjadikan kejujuran sebagai teras berbanding pasar Yahudi bernama *Qainuqa* yang turut bersaing sekali dengan peniaga Islam. Akhirnya pasar Yahudi yang diwarnai riba dan penipuan di tumpaskan oleh pasar yang dikuasai peniaga Muslim yang berdisiplin dan jujur (Hamat, 1992).

Konsep Utama Dalam Keusahawanan Islam Berteraskan Usahawan Al Falah

Konsep Penghayatan Agama Dalam Keusahawanan Islam

Sebenarnya, penghayatan agama dalam organisasi dan kajian pengurusan tidak banyak dikaji (Carneiro-da-Cunha et al., 2015). Dodd dan Seaman (1998) berpendapat bahawa agama mempengaruhi aktiviti keusahawanan, mempengaruhi keputusan mereka untuk menjadi usahawan, gaya pengurusan mereka dan ruang lingkup rangkaian hubungan mereka. Selanjutnya, interaksi nilai agama dengan budaya perusahaan dan bagaimana agama mempengaruhi pengambilan keputusan keusahawanan khususnya di kalangan agama Timur seperti Islam (Carswell dan Rolland, 2004; Audretsch et al., 2013). Oleh itu, Islam dan pengaruhnya terhadap keusahawanan melalui apa yang dikenali sebagai keusahawanan Islam (*Islamic Entrepreneurship*) nampaknya menjadi bidang penyelidikan perniagaan yang penting (Ratten et al., 2017) yang patut dikaji.

Mengaitkan usahawan al – Falah dengan penghayatan agama melibatkan 3 cabang utama iaitu ‘akidah’ sebagai teras pegangan hidup, ‘syariah’ penyusunan amalan hidup yang membentuk

tingkah laku dan ‘akhlak’ sebagai etika hidup manifestasi daripada akidah yang jelas dan syariah yang mantap. Ketiga-tiga cabang ini perlu bergerak seiring dan bersepadan tanpa sebarang pemisahan bagi melahirkan usahawan Muslim yang terbaik berasaskan kehendak Islam iaitu al – Falah (S. Hamid & C. Zarrina, 2016). Penghayatan agama juga dilihat sebagai patuh kepada agama (tadayyun, bertakwa dan warak), menjawai prinsip ajaran Islam, taat beramal dengan segala perintah syarak kerana Allah SWT dari aspek suruhan atau larangan malah memberi komitmen yang tinggi dalam melaksanakan Islam mengikut kemampuan (Zainab et. al, 2010). Seseorang dianggap beragama jika tutur kata dan tingkah lakunya dikawal oleh penghayatannya terhadap agama (al-Baalhaki, 1982; Lane, 1863). Penghayatan agama merupakan sesuatu yang boleh dirasai dan sebagai satu keperluan seruan batin semulajadi untuk mengakui bahawa mereka dan alam sekeliling memilki Tuhan yang maha agung (al – Qardadawi, 1988).

Konsep Keberkatan Dalam Keusahawanan Islam

Keberkatan berkait rapat dengan kerohanian. Perkataan berkat berasal dari *barakah* (Ahned et al., 2003 Dalam Zain, 2016) dan daripada konsep *barakah* bermaksud *blessing, benediction, prosperity* yang berkait dengan nasib baik, kemakmuran, kebaikan berterusan dan kebahagian (Munir, 1999 dalam Mohd Zain, 2016). Dalam konteks Islam, berkat dikaitkan dengan restu Allah SWT agar dikurniakan kebaikan yang bertambah dan berterusan dan hakikatnya keberkatan adalah milik kekuasaan dan keizinan daripada Allah SWT (Zain, 2016) sebagaimana firman Allah SWT dalam surah Maryam ayat 31 bermasud:

“Dan Ia menjadikan aku seorang yang berkat di mana sahaja aku berada, dan diperintahkan aku mengerjakan sembahyang dan memberi zakat selagi aku hidup”.

Ulama fiqh berpendapat bahawa ayat tersebut merujuk kepada keberkatan yang diperolehi dengan melaksanakan perintah Allah SWT dan menjauhi larangan-Nya dalam apa jua keadaan (Ibnu Kathir, 2006 dalam Zain, 2016). Justeru, konsep keberkatan berkait secara langsung dengan perlakuan seseorang Muslim di mana lebih baik tingkah laku lebih banyak keberkatan dan begitu juga sebaliknya. Tindakan yang baik akan menjanjikan ganjaran dan jaminan kejayaan pada akhirnya walau apa pun hasil yang diperolehi (Mushtaq, 1999).

Keberatan dalam konteks keusahawanan akan menghasilkan kejayaan kepada seseorang pengusaha dalam pelbagai bentuk seperti perniagaan yang berkembang maju, rezeki perniagaan yang tidak putus malah semakin bertambah, perniagaan yang bertahan lama serta memberi sumbangan besar kepada ummah, masyarakat serta negara. Ganjaran ini jelas dinyatakan di dalam Al-Quran di mana Allah SWT menjanjikan keberkatan daripada langit kepada mana-mana komuniti yang patuh kepada syariat-Nya (Jalil, 2016; Mohamad & Fadillah Mansor, 2019; Nadzri & Yaacob, 2019). Ada pelbagai cara dan amalan yang boleh mengundang kepada keberkatan rezeki dalam keusahawanan. Menurut KH. Mukhliz (2014), antara amalan yang boleh mengundang keberkatan adalah memperbanyakkan istighfar, ibadah sunnah, sedekah, berbakti kepada kedua ibu bapa, sabar, syukur dan ikhlas, zikir dan membaca al – Quran, membudayakan silaturrahim serta menyantuni anak – anak yatim. Malah kajian yang dibuat oleh Suhaila et al (2019) mendapatkan usahawan Muslim yang berjaya terdiri daripada memiliki akhlak yang baik, tidak bakhil, menjauhi riba, arak, judi dan amalan-amalan syirik, tidak melakukan kezaliman, jihad

melalui harta benda dan jiwa, sentiasa bertaubat, menjaga solat dan rajin membaca al – Quran. Sikap itu dilihat mengembangkan harta mereka.

Konsep Usahawan Muslim Berjaya (al – Falah) Dalam Keusahawanan Islam

Menurut Muhamad Akram (2003), Usahawan Muslim Berjaya (al - Falah) secara literalnya difahami sebagai kejayaan yang merangkumi kehidupan di dunia dan akhirat selaras dengan pandangan hidup Islam yang syumul. Usahawan Muslim yang memiliki kejayaan (al – Falah) dilihat mempraktikkan tuntutan rukun Islam dan Iman secara bersepada. Hanya golongan manusia yang dikategorikan sebagai Muslim, Mukmin dan Muttaqin sahaja yang dilihat layak mendapat kejayaan sebagaimana yang dijelaskan oleh Islam (Shuhairimi et al., 2018).

Selain itu, pada asasnya untuk seseorang usahawan Muslim mencapai kejayaan (al – Falah), Empat (4) prinsip yang berteraskan ‘maqasid al – syariah’ perlu imiliki. Prinsip – prinsip tersebut adalah Rabbaniyah (ketuhanan), Akhlak, Insaniah (kemanusiaan) dan Keseimbangan (Wasatiah). Inilah yang membezakan perniagaan cara Islam dengan bukan Islam. (Shuhairimi, 2014). Menurut al – Qurtubi (1967), terdapat lima (5) prinsip untuk mencapai kejayaan (al – Falah) dalam keusahawanan iaitu rezeki yang halal, qana’ah (bersyukur atau reda dengan apa yang diperolehi), taufik (petunjuk), sa’adah (kebahagiaan) dan jannah (syurga). Kelima – lima prinsip ini membezakan aspek kejayaan dalam konteks Islam dengan yang lain kerana menekankan kejayaan dan kesejahteraan di akhirat sebagai matlamat utama.

Dalam buku Tipologi Keperibadian Nilai – Nilai Murni Usahawan Berjaya oleh Shuhairimi Abdullah (2014), kejayaan dan kesejahteraan disimpulkan sebagai al – Falah adalah berasaskan kepada metodologi yang digariskan syarak iaitu suatu kepercayaan terhadap orde tauhid iaitu beriman kepada ajaran Islam berasas al – Quran dan as - Sunnah dan sentiasa berpegang kepada satu cara hidup Islam yang menyeluruh. Dari sudut perspektif keusahawanan pula, terminologi konsep al – Falah berasas kepada interaksi pengusaha secara positif dengan Pencipta, sesama manusia dan alam berasaskan kepada prinsip muamalah Islam dengan bermatlamatkan kepada kesejahteraan dan keselamatan dunia dan akhirat (Shuhairimi, 2014).

Konsep al – Falah ini juga dirakam dalam al – Quran antaranya seperti firman Allah SWT :

“Sesungguhnya berjayalah orang yang beriman. Iaitu mereka yang khusyuk dalam sembahyangnya. Dan mereka yang menjauhkan diri dari perbuatan dan perkataan yang sia – sia. Dan mereka yang berusaha membersihkan hartanya dengan menunaikan zakat harta itu. Dan mereka yang menjaga kehormatannya. Kecuali kepada isterinya atau hamba sahayanya, maka sesungguhnya mereka tidak tercela. Kemudian, sesiapa yang mengingini selain dari yang demikian, maka merekaalah orang yang melampaui batas. Dan mereka yang menjaga amanah dan janjinya. Dan mereka yang tetap memelihara sembahyangnya. Mereka itulah orang yang berhak mewarisi Syurga Firdaus; mereka kekal di dalamnya (al – Mukminun: 1 – 11).

Berdasarkan ayat – ayat tersebut, dapatlah dirumuskan bahawa untuk seseorang usahawan Muslim mencapai kejayaan seperti yang digariskan syarak mestilah menunaikan solat, menginfaqkan hartanya kepada golongan miskin, beriman dengan hari akhirat, takut kepada azab Allah SWT,

memelihara kemaluan, menjaga amanah dan janji, memberikan kesaksian dan memelihara solatnya (Adnan Alias, 2002). Ini selaras dalam sebuah hadith yang diriwayatkan daripada Abu Hurairah R.A. maksudnya:

“Rasulullah SAW bersabda: yang disebut kaya, bukanlah kaya harta benda dunia, tetapi yang dikatakan kaya ialah kaya jiwa”.

(HR Muslim)

Beginu juga dalam sebuah hadis daripada Anas bin Malik RA, Rasullullah SAW bersabda maksudnya :

“Sesungguhnya apabila orang – orang kafir mengerjakan kebaikan di dunia, dia diberi upah dengan amalnya itu berupa rezeki di dunia. Bagi orang – orang mukmin maka pahala kebaikannya disimpan oleh Allah SWT untuknya di akhirat serta dianugerahkan rezeki di dunia yang berkaitan dengan ketaatannya”.

(HR Muslim)

Kesimpulan

Justeru, perlu di fahami bahawa konsep usahawan Muslim berjaya tidak semestinya memiliki terminologi al – Falah memandangkan mana – mana usahawan Muslim sama ada mematuhi syariat atau tidak masih dianggap berjaya apabila memiliki kejayaan fizikal dari segi keuntungan, syarikat yang kukuh dan mampu bersaing di peringkat global. Walaubagaimanapun untuk mencapai standard al – Falah belum layak di perakuan memandangkan penghayatan agama dan aktiviti keusahawanan tidak menepati garis panduan yang ditetapkan syariat Islam. Kejayaan yang dimiliki hanya mendapat pengiktirafan dunia semata – mata. Namun, usahawan Muslim yang berjaya (al – Falah) bukan sahaja mencapai standard kejayaan sebagaimana digaris pendek secara fizikal tetapi secara konsisten melaksanakan tugasnya sebagai khalifah untuk melakukan kebaikan kepada manusia demi mencari keredhaan yang hakiki. Semangat kejayaan yang dimiliki usahawan Muslim mendorong mereka mengoptimumkan segala sumber-sumber yang dianugerahkan oleh Allah s.w.t. untuk kemaslahatan umat manusia sejagat. Pada masa yang sama usahawan Muslim berjaya berdasarkan konsep al - Falah sentiasa memastikan sebarang bentuk penyelewengan dan unsur-unsur yang boleh mencemarkan keharmonian sistem keusahawanan Islam dijauhi. Sementara itu, harta yang diperolehi melalui aktiviti perekonomian bukan bersifat pemilikan mutlak, sebaliknya manusia hanyalah sebagai pemegang amanah yang menguruskan sumber tersebut. Usahawan Muslim berjaya juga perlu mengambil kira faktor pembangunan insan dalam lapangan kerja yang diusahaannya. Contohnya, melazimkan sembahyang berjamaah dalam kalangan pekerjanya, membudayakan penghayatan ilmu dalam kalangan stafnya, bersifat terbuka dan bertoleransi terhadap kritikan yang membina, menunaikan tanggungjawab sosial kepada masyarakat luar dan menekankan nilai-nilai murni dalam organisasinya. Usahawan yang mempraktikkan nilai-nilai tersebut akan mendapat ganjaran yang besar kelak.

Rujukan

- Abdul Hamid, S., Ishak, M. S., HASHIM, H. (2017). Penghayatan Agama (Religiositi) dalam Pembangunan Keusahawanan. *Jurnal Pembangunan Sosial*, April. <https://doi.org/10.32890/jps.20.2017.11546>
- Audretsch, D. B., Boente, W., & Tamvada, J. P. (2013). Religion, social class, and entrepreneurial choice. *Journal of Business Venturing*, 28(6), 774-789.
- Aminuddin, Z. S., Ahmad Bustamam, U. S., & Mahyuddin, Muhamad Khairi, Sathiman, S. (2017). Exploring the Concept of Al-Fal Āḥ (Success) in Business□: an. *Exploring the Concept of Al-Fal Āḥ (Success) in Business□: An*, 4(August 2016).
- Alias,A., Mohamed, H., Ibrahim D.M. (1992). *Konsep Keusahawanan Islam*.Arina Publication House. Selangor Darul Ehsan
- Almansor Abu (2010), Cabaran dan Halangan Membangunkan Usahawan Bumiputera Berjaya. Access Online. <http://about-research.blogspot.com/>
- Alias, A. (2001). “Usahawan dan Keusahawanan” dalam MEDEC. Keusahawanan. Cetakan keempat. Universiti Teknologi MARA, Selangor
- Beekun, Rafik Issa. (1997). Islamic Business Ethics. Herndon V.A: International Institute of Islamic Thought.
- Carneiro-da-Cunha, J. A., Santos, M. G. D., Souza, L. J. D., Alssabak, N. A. M., & Macau, F. R. (2015). The history of an Islamic entrepreneurship: Achieving exporting-network leadership through religious legitimacy. *International Journal of Business and Globalisation*, 15(3), 272-293.
- Carswell, P., & Rolland, D. (2004). The role of religion in entrepreneurship participation and perception. *International Journal of Entrepreneurship and Small Business*, 1(3-4), 280-286.
- Dodd, S.D. and Seaman, P.T. (1998) „Religion and enterprise: an introductory exploration”, *Entrepreneurship Theory and Practice*, Fall, pp.71–86
- Ghazali, Hj. Hamat. (1992). “Keusahawanan Islam” dalam MEDEC, *Asas Keusahawanan*. Shah Alam: Biroteks.
- Haron, S. (1990). Ke Arah Menjadi Usahawan Yang Berjaya. Dewan Bahasa dan Pustaka. Kuala Lumpur.
- Hashim, A. (2003). *Bisnes Satu Cabang Jihad*. Utusan Publication & Distributors.
- Hamid, S. A., & Zarrina, C. (2016). Keutamaan Akhlak Dalam Pembangunan Keusahawanan Islam. *Jurnal Syariah*, 24(2), 271–286.

- Ismail, Wan Ibrahim Wan Ahmad, Nor Salimah Abu Mansor.(2010). Dimensi Penghayatan Agama Mengikut Pendapat Tokoh Agama Semasa. *Jurnal Pembangunan Sosial* Jilid 13 (Jun) 2010: 37–56.
- Jalil, A. (2016). Keberkatan Dalam Pembelajaran (Barakah in Learning). *Peneraju Profesional CFA Group 5 Induction Programme*. Yayasan Peneraju Pendidikan Bumiputera.
- Joni, T. B. (2008). Pemikiran Pembangunan Ekonomi Berteraskan Islam. *Jurnal Usuluddin*, 27(March), 93–107. http://apium.um.edu.my/journals/journal_usul/No_Usul.php
- Kementerian Kewangan Malaysia. (2019). *Belanjawan 2020 :Tinjauan Ekonomi 2020*. <https://www.Parlimen.Gov.My/Ipm/Eps/2019-10-11/CMD%2026.2019%20BM..Pdf>.
- M. Balog, A., T. Baker, L., & G. Walker, A., G. Walker. (2014). Religiosity and spirituality in entrepreneurship: a review and research agenda. *Joournal of Management, Spirituality & Religion*. Vol. 11, No. 2, 159 – 186.
- Madeline Berma. (2015). ULASAN BUKU “The Colour of Inequality: Ethnicity, Class, Income and Wealth in Malaysia oleh Muhammed Abdul Khalid” (MPH Group Publishing/ 31 Ogos 2014/ ISBN: 9674152148). *Jurnal Ekonomi Malaysia* 49(2) 2015 149 - 150 <http://dx.doi.org/10.17576/JEM-2015-4902-12>.
- Malaysia. Rancangan Malaysia Kesepuluh 2011 – 2015. Kuala Lumpur. Percetakan Nasional Malaysia, 2010.
- Muhammad Akram Khan. (2003). *Islamic Economics and Finance: A Glossary*. New York: Routledge.
- Mebroui, T., & Mosbah, A. (2020). *Islamic Entrepreneurship□: Issues and Debates*. 7(2), 461–468.
- Mohamad, M. H., & Fadillah Mansor. (2019). Hubungkait patuh-syariah dengan konsep keberkatan: tinjauan dalam konteks standard halal ms 1900. *Journal of Fatwa Management and Research*, 179–197.
- Nadzri, S., & Yaacob, S. E. (2019). *Hubungan Antara Ciri-Ciri Akhlak Usahawan Muslim Berjaya Dengan Cara Berkembangnya Harta Menurut Perspektif Al-Qur'an*. April, 978–967. <http://conference.kuis.edu.my/pasak4/images/Fullpaper/133>
- Noorfazreen Mohd Aris, Sharipah Amirah Hj Abas, Sarah Dina Mohd Adnan, M. F. M. N. & H. J. (2018). Modul Usahawan Tani Islam. *E-Journal of Islamic Thought and Understanding*, 1(1), 16–32.
- Ramadani, V., Ratten, V., & Rashiti, S. G.-. (2017). *Entrepreneurship and Management in an Islamic Context*. Springler International Publishing Switzerland.

- Sarif, S. (2005). Pembangunan Usahawan Muslim Berasaskan Prinsip Islam Hadhari. (Kertas Kerja Seminar Keusahawanan Islam Peringkat Kebangsaan 2005 di Akademi Pengajian Islam, Universiti Malaya, Kuala Lumpur. 6 September 2005.
- Sukemi, Muhammad Najit & Berma, M. & Baharuddin, S.A. & Shahdan, F.. (2018). Pengaruh Tindakan Afirmatif kepada Agihan Kekayaan antara Etnik di Malaysia. Jurnal Ekonomi Malaysia. 52. 297-308. <http://dx.doi.org/10.17576/JEM-2018-5201-22>.
- Shuhairimi Abdullah, Muhammad Shukri Bakar & Solahuddin Abdul Hamid. (2018). Transformasi Usahawan al – Falah Satu Refleksi. Penerbit Universiti Malaysia Perlis.
- Unit Peneraju Agenda Bumiputera (TERAJU, 2015). Pemerkasaan Ekonomi Bumiputera. Laporan Pencapaian 2015. Diperolehi daripada http://teraju.gov.my/reports/pemerkasaan_ekonomi_2015.pdf.
- Zainab Ismail, Wan Ibrahim Wan Ahmad, Nor Salimah Abu Mansor.(2010). Dimensi Penghayatan Agama Mengikut Pendapat Tokoh Agama Semasa. Jurnal Pembangunan Sosial Jilid 13 (Jun) 2010: 37–56.
- Zain, M. (2016). Keusahawanan Islam: Rasulullah SAW dan Sahabat Sebagai Ikon Usahawan Berjaya. Penerbit UMK.